

Ilić: Čast svakoj ekipi, ali mi smo Sloboda i znamo naš cilj!

Euforija nakon velike pobjede Slobode protiv Krivaje, pomalo je splasnula, ali sutrašnja utakmica s Rudarom iz Banovića, u okviru 17. kola Prve lige FBiH – Sjever, prilika je da “solare” pozdravimo u velikom broju i da im i ubuduće budemo podrška na putu ka Premijer ligi.

Darko Ilić na utakmice Sloboda – Krivaja u Tuzli (Foto: Miro Petrović)

Mada se protiv Rudara očekuje “sigurna” pobjeda, utakmica je prilika da pozdravimo buduće šampione koji će pobjedom i zvanično postati lider lige, jer ekipa Krivaje pauzira u ovom kolu, pa će se dvije najbolje ekipe izjednačiti po broju bodova, a Sloboda je bolja za gol u međusobnim susretima.

Jedan od junaka susreta u Zavidovićima, pivot Darko Ilić (postigao 6 golova), još jednom se vraća na tu “povijesnu” utakmicu.

– Znali smo da nas u Zavidovićima čeka težak meč i veliki je pritisak bio na nama. Ali smo isto tako znali koliko vrijedimo i koliko smo kvalitetni. Bili smo mirni tokom čitavog meča i kad smo gubili i kad smo vodili. Na kraju smo zasluženo slavili i pokazali da sloboda i Tuzla zaslužuju Premijer ligu – kaže za portal Tuzla LIVE “kolos iz Mejdana”, Darko Ilić.

U javnosti se već slavi kao da je Sloboda ušla u Premijer ligu, a zaboravlja se činjenica da još ima dosta do kraja takmičenja i da se poslije igra play-off s prvakom grupe Jug (vjerovatno Iskra, Bugojno – op.tl.).

– U nedelju nas očekuje Rudar iz Banovića i mi moramo do kraja biti skoncentrisani i da ništa ne prepuštamo slučaju. U svaku utakmicu moramo ući maksimalno, tako će biti i u nedelju protiv Rudara. Kvalitetiji smo i s pravim pristupom pobjeda neće doći u pitanje. Čast svakoj ekipi, ali mi smo Sloboda i znamo naš cilj. U svakoj utakmici borbena do kraja. Sve je do nas i vjerujem da ćemo “posao” odraditi kako treba i, na kraju, s našim navijačima, dočekati da proslavimo ulazak u Premijer ligu – rekao je Ilić u razgovoru za TZL.ba.

Utakmica Sloboda – Rudar igra se u maloj dvorani Mejdana, u nedjelju od 17 sati, a ulaz je besplatan. (mp)

Date: 09-03-2019